



## QUÆSTIO MEDICA.

*Quodlibetariis disputationibus manè discutienda in Scholis Medicorum,  
die Jovis octavâ Februarii 1714.*

M. ALEXIO LITTRE, Doctore Medico, Regiæ  
Scientiarum Academiæ Socio, Præside.

*An Hydropi Venæ Sectio?*

### I.

**H**UMANUM corpus liquidis componitur & solidis, quæ inter datur æquilibrium. Sanitas stat alterno, continuo pessundatur. In hoc quasi immobile corpus ab omni ferè cessat functione. In illo liquida movent & vincunt solida; & à solidis suâ vice moventur, vincuntur. A liquidis dilatantur vasa, dilatata se se constringunt; sicque liquida urgent, impellunt. Hinc perennis liquidorum in corpore circuitio, ipsorum subactio, elaboratio jugis; continua in singulas partes distributio; indefinens percolatio excrementorum; & optata cunctarum partium nutritio, incrementum. Omnium quibus vivimus partium nullæ nutritiis ferè pretiosiores. Ut illarum laudabilem constitutionem sanitas sequitur; sic earumdem vitiosam mille ægri-tudines. Hinc cæterarum totius corporis partium morbi à pravis & excrementitiis partium nutritiarum humoribus ducunt originem, quos inter hydropem recense, morbum curatu difficilem, & magno sæpè periculo plenum.

**H**YDROPEM voca serosi humoris in quavis corporis parte collectionem. Pro vario humoris collecti situ, varia sortitur nomina. Si totum corpus occupat, Leucophlegmatia, vel Anasarca nuncupatur; Hydrocephalus, si caput; si pectus, ipsius pectoris hydrops; Ascites, si abdomen; si scrotum, hydrocele. Quod si flatibus distindatur abdomen, adeo ut percussum tympani sonum edat, Tympanites appellatur: hæcque inter hydropes improprie ab Autoribus adnumeratur. Communis omnibus causa subest, frustratum apparandi, conficiendi, vel repurgandi sanguinis opus; unde viscerum penè omnium infarctus, ex quo seri à sanguine separatio, ejusque aliquà in parte collectio. Aliam incassum inquisiveris causam præter vitiosam sanguinis constitutionem, laxatumque, vel renitentem solidarum partium elaterem. Vis igitur hydropem sanare præsentem, imminentem præcavere, talia adhibeas remedia quæ liquidorum motum promovere, solidarum elaterem firmiorem laxare, laxiorem verò firmare valeant.

## III.

**T**ANTA requiritur solidorum, & fluidorum necessitudo, & convenientia, ut mirum non sit cur uno deficiente alterum deficiat. Sanguis spirituosus ille liquor ab indole genuinâ desciscens, corruptâ subhinc onustus saburrâ, lento pede vasa dum permeat, quodcumque malum invehere potest. Quidni! & hydropem accersere. Quocunque enim pergit, funestam itineris notam inurit. Præ suâ malâ diathesi innumerus cum scateat impuritatibus, viscidiores, & crassiores ipsius partes liberam circuitus viam liquoribus præcludunt. Hæ paulatim aggeruntur, & aggestæ, vasa quàm plurimis infarciunt obstructionibus. Undè hærens in circuitu sanguis, novusque semper appellens, vasorum distindit tunicas, earumque magis ac magis dilatat meatus. Hi sensim ac sensim dilatati serum effluere sinunt. Id experientiâ confirmari videtur. Ligatâ siquidem canis venâ infra præcordia abdomen quasi ascite laboraret humore aqueo brevi repletum observatur. Tunicæ quoque Lymphaticorum cum tunicis Venarum sint longè tenuiores, seri effusioni ac collectioni ansam præbere possunt, suorum pororum dilatatione, sed & præterea suâ ruptione. Rem experientia probat, extracti scilicet humoris igni admoti abluminis ovi consistentiam acquirētis indagine.

Tandem sanguis crassus aut viscidus<sup>3</sup> glandulas difficilè permeans in iis sensim colligitur, stagnat, eas intumescit, ipsarumque excretorios ductus distendit, amplificat. Hinc seri à sanguine uberior secretio, ejusdemque seri è vasis effusio, ac tandem hydropis generatio. Quamobrem proprio vehiculo orbatus sanguis, partes agrè pervadit, hisque nutritium vix impertitur succum, undè universi corporis macies, siccitas debilitas.

## IV.

**M**AGNORUM morborum aut ingruentium, aut jam sævientium, præstans remedium est Venæ sectio, eoque præstantius excellentiusque, quò tutiori expeditiorique viâ omnia ferè corporis vitia rescindit. Hac datâ portâ luxurians toto corpore sanguis convenienter emittitur. Ocyùs ardentem materiem subtrahe, carbones remove, spontè restinguetur incendium. Idem celebratâ Venæ sectione corporis humani humoribus evenit. Eductâ quippe sanguinis propriè dicti parte, minor fermentationi effervescentiæ, obstructioni, infarctui, &c. datur locus. Restitutâ circuitionis celeritate, quanti quanti sunt humores, eandem choream sequi coguntur. In hydrope vires opprimit ac veluti vinctas tenet crassus & viscidus humor viscerum ergastulis coercitus (cujus sub pondere fatiscit corpus) systalticus dilationis & constrictionis vasorum motus depravatur: ipsorum fibræ motrices fungi officio ferè inhabiles evadunt, sed incisâ venâ non rarò aperitur ad magnam libertatem viâ, & temporis puncto spes salutis affulget.

## V.

**H**YDROPI ita necessaria est Venæ sectio, ut nefas sit illam omittere. Revera præcipuus curationis cardo positus est in fibrarum elatere, & liquorum fluxilitate restituendis; ut vinci possit & superari sanguinis impedimentum; ut pertinaces tollantur obstructiones, sanguinis circuitus feliciter peragatur, ac tandem functiones in pristinum statum reducantur. Hæc omnia idoneâ sanguinis missione assequeris. Nec est quod objiciant nonnulli in hydrope venam secare idem esse ac jugulare. Redundans (quis crederet) sanguis id efficit sæpissimè. Qui, hoc morbo laborarunt, ferè omnes ore, naribus, &c. sanguinem emisere. Succedit plerumque catameniis & hæmorroidibus suppressis. Denique sanguinis grumos ac concretiones in hydro-

picorum cadavere reperire nihil ulitatus. His omnibus cùm sanandis, tùm præcavendis congruum Venæ sectio remedium. Præterea eâdem Venæ sectione impurius circa viscera restagnans, & evasata illuvies vasa denuò subit, cum sanguine foras exitura, vel transcolanda per glandulas, vel per cutis meatus tandem vacuanda. Dolores insuper sedat Venæ sectio, corpus erigit pondere gravatum; erectum, alacrius expeditiusque reddit ad omnis generis functiones obeundas.

*Ergo hydropi Venæ sectio.*

Domini Doctores disputaturi.

*M. Salvator Cluscard.*

*M. Claudius Vergne.*

*M. Philippus Donté, Academia Censor.*

*M. Claudius du Cerf.*

*M. Ludovicus Guillot.*

*M. Amandus Donté, Serenissime Ducissæ Biturigum Medicus primarius.*

*M. Joannes Baptista Eugenshard.*

*M. Joannes Baptista Fermel-huis, in Regiâ Artium Academicâ Socius honorarius.*

*M. Franciscus Gouel.*

Proponebat Parisiis FRANCISCUS BAILLY Parisinus, Baccal. Medicus.  
A. R. S. H. 1714.

Ex Typographia JACOBI QUILLAU, Typ. Jur. Lib. Universitatis, in viâ  
vulgò dicta *Galande*.